

# CBETA電子佛典集成

---

CBETA Chinese Electronic Tripitaka Collection  
eBook

T14n0479

## 善思童子經

隋 闍那崛多譯

財團  
法人

佛教電子佛典基金會



# 目次

- [編輯說明](#)
- [章節目次](#)
- [卷目次](#)
  - 001,
  - 002
- [贊助資訊](#)

## 編輯說明

- 本電子書以「CBETA 電子佛典集成 Version 2023. Q4」為資料來源。
- 漢字呈現以 Unicode 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 [service@cbeta.org](mailto:service@cbeta.org) 回報。
- 版權所有，歡迎自由流通，但禁止營利使用。

No. 479 [Nos. 477, 478]

善思童子經卷上

隋天竺三藏闍那崛多譯

如是我聞：

一時婆伽婆住毘耶離城，在菴婆羅波梨園內，與諸聲聞、八千比丘、一萬菩薩，如是大眾一切悉皆變化形服作諸天身。爾時，世尊於晨朝時著衣持鉢，將此化眾前後圍遶，入毘耶離大城之中次第乞食，漸漸行至毘摩羅詰離車之家。當於是時，毘摩羅詰離車家內，有一童子名曰善思。是時善思在於自家重閣之上嬾母抱持，時彼童子手中秉執一莖蓮華翫弄嬉戲，而彼童子以其宿植眾善所熏，又佛世尊神通力故，令此童子忽然以偈白其嬾母，作如是言：

「今有響微妙， 翳諸音樂聲；  
願嬾放我身， 捨置於樓上。  
而此光明照， 決是大丈夫；  
右足跨於闔， 欲入此城門。  
微妙令意喜， 諸鳥鳴喚聲；  
我耳未曾聞， 諸鳥如是唱。  
決定是調御， 為利益世間；  
右足跨於闔， 欲入此城門。  
如服諸瓔珞， 遍體震鳴聲；  
其響妙鏗鏘， 聞者皆歡喜。  
決定千輪足， 威神莊嚴身；  
右足跨於闔， 欲入此城門。  
猶彼大地震， 亦如打銅鍾；  
諸如是等聲， 無有不聞者。  
決定彼人日， 大聖之身光；  
欲入此大城， 令眾生無畏。  
如諸林樹木， 種種華莊嚴；  
各聞微妙音， 眾生隨所樂。  
決定善安住， 與願大龍王；  
右足跨於闔， 欲入此城門。  
如虛空光照， 大地普皆明；  
日彩曠不彰， 此世尊金色。  
決定喜觀察， 大威放焰光；  
右足跨於闔， 欲入此城門。」

阿彌今觀此， 天眾在虛空；  
歡喜歌嘯聲， 弄諸衣服等。  
決定利益世， 最勝諸眾生；  
右足跨於闍， 欲入此城門。  
今此大城內， 相向起慈心；  
各各共喜歡， 如父母愛子。  
決定大福聚， 眾德莊嚴身；  
右足跨於闍， 欲入此城門。  
又男夫婦女， 將種種香花；  
滿掬四面飄， 心生大歡喜。  
決定大自在， 福德華莊嚴；  
右足跨於闍， 欲入此城門。  
天人華所散， 悉遍滿虛空；  
處處雨眾香， 微妙甚可熹。  
決定世善逝， 大福慧入城；  
為利益眾生， 所以今來到。」

爾時，善思懷抱彌母，聞其童子自口所說如此偈已，心生恐怖身毛悉豎，支節戰掉不能自持。安彼童子於樓閣上，置已即作如是思惟：「此子何也？為天、為龍、為是夜叉、為是羅刹、為鳩槃荼、為毘舍遮、為緊陀羅、或復為是摩睺羅伽？如此之言非是世間嬰孩所說。」時彼彌母即一定住不敢動移，亦不起行不敢大語，細喘低頭默然察聽。

爾時，世尊漸漸行近善思離車童子之家，入彼街巷至於其家門前止住。而是善思離車童子，遙見世尊在於閣下，見已即便從高樓上投身向佛。是時善思離車童子，以佛神力在於空中巖然而住，即以偈頌而白佛言：

「世尊住智中， 最勝者住此；  
利諸眾生故， 願受我蓮花。」

爾時，世尊即還以偈報於善思離車童子，作如是言：

「我所住實際， 非眾生境界；  
彼際無所有， 是際如實相。」

爾時，世尊說是語已，離車童子復更以偈而白佛言：

「世尊云何住， 於此真實際？  
此際既無有， 無有何所住？」

爾時，善思離車童子說是語已，佛復以偈而更報言：

「如際實際者， 彼際是如來；  
如彼實際住， 我住彼亦然。  
如實際諸佛， 其體一無殊；  
如彼真實際， 我作如是住。」

爾時，世尊說是語已，善思童子復更以偈重白佛言：

「非際際非際， 此際有何相？  
作何等方便， 得名為實相？」

爾時，善思離車童子說是語已，佛復以偈而更報言：

「不可執際際， 故言為實際；  
彼際如虛空， 虛空亦無相。」

爾時，世尊說是語已，善思童子還更以偈白於佛言：

「希有真實處， 住處最上住；  
願眾生住此， 如諸佛所住。」

爾時，善思離車童子說此偈已，一心合掌而白佛言：「惟願世尊，慈愍我故受此蓮華。」

爾時世尊為欲憐愍善思離車孩童童子故受彼蓮華。佛受華已，是時善思離車童子，歡喜踊躍發是願言：「藉此善根，我於來世，若當證得阿耨多羅三藐三菩提已，如今世尊，為於一切眾生說法。然其法中，諸凡夫法及阿羅漢，一切聖法皆不可得。」

爾時，長老舍利弗同在集會聞是語已，於大眾中即問善思離車童子作如是言：「離車童子！汝向所言，我當證彼如是法已，為諸眾生說於彼法。云何說法？彼法云何？」

爾時善思離車童子，即以偈答舍利弗言：

「彼法無有佛， 及諸聲聞得；  
我當證是法， 為諸眾生說。」

彼法無處所， 亦復無去來；  
智者如是知， 法之本體性。  
過去一切佛， 現在無上尊，  
無不如是知， 人無餘寂滅。  
彼中無法界， 眾生界亦無；  
如是之邊際， 世間無人者。  
法界惟名字， 字從分別生；  
分別無分別， 究竟不可得。」

爾時，長老富婁那彌多羅尼子，即於眾中還以偈問善思童子，作如是言：

「童子汝云何， 能學解此法？  
甚深無譬喻， 諸智者所迷。  
汝今身未行， 已作如是辯，  
能對最第一， 智慧大聲聞。  
汝體如真金， 遍皆巧知解；  
顯赫此城巷， 如月處虛空。」

爾時，善思離車童子即還以偈，答於長老富婁那彌多羅尼子，作如是言：

「尊者今言生， 此生無有處；  
諸法無生故， 當生此是何？  
諸法既無生， 何者名真體？  
此我說本性， 一切諸法無。  
法及法本性， 二俱不可得；  
二既不可得， 此法諸佛說。  
是名最上輪， 鹿苑中前轉；  
虛空搦拳已， 令覺多聲聞。  
唯鳴於法聲， 眾生多誑惑；  
乘方便及智， 當說如真實。  
言生及死者， 是名凡夫境；  
此之顛倒見， 富婁那未盡。  
生死及彼此， 世間人言語；  
無言語法中， 假以語言說。」

爾時，長老富婁那彌多羅尼子，聞此偈已歡喜稱讚，即便白佛作如是言：「希有，婆伽婆！希有，修伽陀！此之善思離車童子，乃有如是甚深智慧難可度量。」

是時佛告富婁那言：「如是，如是！汝富婁那如汝所說。」

爾時，世尊問於善思離車童子作如是言：「善思童子！汝今欲為何誰證於阿耨多羅三藐三菩提？」

是時善思離車童子，即以偈頌而答佛言：

「佛最勝世尊， 知而故問我；  
欲為誰著鎧？ 今當真實宣。  
我無所為人， 亦無著鎧者；  
甚深上法中， 無受化眾生。  
眾生非眾生， 一切皆無有；  
此處不迷惑， 彼名為世尊。  
如是生解法， 如實際常處；  
非一非無異， 此甚深最上。  
我當令覺眾， 彼眾生亦無；  
眾生體既無， 彼中何有智？  
智慧及眾生， 性畢竟非有；  
若能如是解， 彼名世智人。」

爾時，善思離車童子說是偈已而白佛言：「大聖世尊！我若當來自覺了知如是法已，為諸眾生作如是說。」

是時長老阿難比丘，於大眾中即從座起而白佛言：「世尊！希有，婆伽婆！希有，修伽陀！此之善思離車童子乃能如是宣說甚深微妙法句、不染著句、無倚著句。此深法中，天、人、世間恐怖迷沒。世尊！如是實性甚深法中誰不欲行？惟有昔於甚深法中有因緣者乃能生信。」爾時阿難欲重宣此義，而說偈言：

「猶如聚真金， 遙觀妙顯赫；  
此善思童子， 處在大眾中。  
譬如須彌山， 安住於海內；  
如是善說法， 彌覆此世間。  
無有及非無， 善思童子說；  
如是彼實際， 實際亦空無。  
汝今說此時， 不曾生恐怖；  
善思汝如是， 我云何得知？」



爾時，善思離車童子聞是語已，即還以偈報阿難言：

「我已誓捨身， 著此無為鏡；  
無望故求道， 多聞如是知。  
為五欲所迷， 墮於可畏獄；  
今見無上尊， 我云何不喜？  
世尊大慈愍， 化度諸眾生；  
我身不墜傷， 今在佛前住。  
虛空及我體， 此二悉是無；  
身及空既無， 云何當畏壞？  
佛身及空體， 真實不可分；  
能有此忍心， 彼中無怖畏。  
虛空及大地， 真如中悉無；  
我今真實知， 是故無恐怖。  
虛空遍大地， 畢竟不可得；  
無真無生故， 真實無驚畏。  
虛空無有高， 下處亦無有；  
如是法知者， 彼無虛可驚。」

爾時，善思離車童子說是偈已，佛即問言：「善思童子！汝不畏耶？」

是時善思即答佛言：「善哉世尊！我實無畏。」

佛復更問善思童子：「汝不恐耶？」

善思答言：「善哉，世尊！我實無恐。」

佛復問言：「善思童子！汝不怖耶？」

善思答言：「善哉，世尊！我實不怖。」

爾時，世尊讚善思言：「善哉，善哉！善思離車！真實善哉！汝今乃能如是不畏、不恐、不怖。」佛因此事，即為善思而說偈言：

「有有故怖生， 彼有不可得；  
能定此忍者， 彼即近菩提。  
取相言眾生， 而眾生無有；  
能如是了達， 彼即住真乘。  
菩提無得人， 不得得不得；  
離此得不得， 恐怖心則無。  
若能如是知， 有無皆不住；  
善思汝當識， 此路趣菩提。」

爾時，世尊說此偈已，復告善思作如是言：「善思童子！是故菩薩摩訶薩等，若欲速疾安樂得成阿耨多羅三藐三菩提者，當應須念常相、樂相、我相、淨相，及眾生相，壽命、養育、福伽羅相，此相即是阿耨多羅三藐三菩提真正直路。善思童子！我於往昔發心行於菩薩行時，常念此路，以是義故，我乘此路得至菩提；然其此路無有一法而可得者，此即是我無上菩提。」

爾時，世尊欲重宣此義而說偈言：

「我雖說常相，其常非是有；  
既知無有常，即無有諍競。  
有著樂相者，樂亦無真實；  
此是顛倒見，分別福伽羅。  
若知諸法真，各各無集處；  
彼等不作相，命及福伽羅。  
路非是菩提，非路亦復爾；  
我說此本性，諸法無處所。  
本性及眾物，智者不分別；  
善思汝當知！此路向菩提。  
若著如是路，彼佛非行道；  
若著有相者，彼不知諸法，  
亦不能乘乘，諸佛所憐愍，  
無有人能行，此寂甚深處。  
一切處無物，彼物不可物；  
既無有物故，彼樂無處生。  
諸樂及諸苦，此路如虛空；  
能得如是覺，彼心得解脫。  
我雖說我相，此法亦無有；  
既無有所，亦復無有智。  
既無有智知，此即智境界；  
壽命分別有，其相畢竟空。  
無有言知者，小智即迷惑；  
我相及壽命，本性非是有。  
本性及諸物，此愚癡境界；  
彼等不能近，不思議佛乘。  
不聞深經典，復不讀誦持；  
此經典不說，無有諸法相。  
我不得諸法，說處亦復無；  
我昔坐道場，無一智可證。

此智我如是， 菩提不可得；  
菩提及道場， 此二無證者。  
凡夫輩分別， 諸佛說諸法；  
此是假名字， 諸佛甚深處。  
甚深及諸佛， 此是魔境界；  
不聞此經典， 佛世尊所說。  
彼等不知味， 諸法利益處；  
菩薩行苦行， 其行無知故。  
言佛及菩提， 此二不可見；  
如是思惟已， 妄言諸佛說。  
稱有諸境界， 倚之而生著；  
既有染著處， 彼等不見我。  
若有諸眾生， 成就甚深智；  
彼等大唱說， 諸佛不思議。  
是故汝善思！ 欲知甚深法，  
精勤當用心， 即知法真實。  
彼法實無礙， 故名為甚深；  
如是說之時， 名為不可得。  
眾生顛倒見， 此非彼境界；  
非以禪定求， 可知真實義。  
三昧非三昧， 空中不可得；  
此非智境界， 無智亦復然。  
雖令覺彼際， 亦非智境界；  
此法從緣有， 甚深即能入。  
若有樂寂靜， 則無有彼此；  
若心能信樂， 正說此經處。  
彼非一佛邊， 昔種諸善根；  
於多諸佛所， 乃能受持此。」

爾時，世尊說此偈已，復告善思離車童子作如是言：「善思童子！以是義故，諸大菩薩摩訶薩等，一切應當著如是鎧。於世間中所有恐怖驚畏之處，應於彼中不生驚、畏、恐、怖之意。發於此心如是著鎧。」

是時善思即白佛言：「大聖世尊！我信如是，而世間中所不信處。」

爾時，世尊復告善思童子：「有諸菩薩摩訶薩等行於甚深，有如是相、有如是瑞、有如是形。彼等一切諸善丈夫，觀於世間無有諸法

可優劣者。既見一切諸法平等無有優劣，如是知已而心不畏、不怖、不驚。

「斷一切諸法，如是知已而不驚；不斷一切諸法，如是知已而不怖。

「有一切諸法，如是知已而不驚；無一切諸法，如是知已而不畏。

「聚一切諸法，如是知已而不驚；散一切諸法，如是知已而不畏。

「和合一切諸法，如是知已而不驚；不和合一切諸法，如是知已而不畏。

「嫌一切諸法，如是知已而不驚；不嫌一切諸法，如是知已而不畏。

「思念一切諸法，如是知已而不驚；不思念一切諸法，如是知已而不畏。

「造作一切諸法，如是知已而不驚；不造作一切諸法，如是知已而不畏。

「境界一切諸法，如是知已而不驚；非境界一切諸法，如是知已而不畏。

「歡喜一切諸法，如是知已而不驚；非歡喜一切諸法，如是知已而不畏。

「世諦一切諸法，如是知已而不驚；非世諦一切諸法，如是知已而不畏。

「寂靜一切諸法，如是知已而不驚；非寂靜一切諸法，如是知已而不畏。

「解一切諸法，如是知已而不驚；不解一切諸法，如是知已而不畏。

「持戒一切諸法，如是知已而不驚；破戒一切諸法，如是知已而不畏。

「明一切諸法，如是知已而不驚；無明一切諸法，如是知已而不畏。

「有名一切諸法，如是知已而不驚；無名一切諸法，如是知已而不畏。

「一切法出，如是知已而不驚；一切法不出，如是知已而不畏。

「一切法怖，如是知已而不驚；一切法不怖，如是知已而不畏。

「一切法生，如是知已而不驚；一切法不生，如是知已而不畏。

「一切法死，如是知已而不驚；一切法不死，如是知已而不畏。

「一切法菩提，如是知已而不驚；一切法非菩提，如是知已而不畏。

「一切法涅槃，如是知已而不驚；一切法非涅槃，如是知已而不畏。能作如是說法之時，是名菩薩不畏、不驚、不恐、不怖。」

爾時，世尊說是語已，欲為善思重宣此義而說偈言：

「一切法無有， 真如不迷惑；  
諸法無有故， 彼相即寂滅。  
諸法無優劣， 此彼悉皆無；  
一切法無故， 真實亦復無。  
諸法有優劣， 此彼亦各無；  
諸法既悉空， 則無有諍競。  
一切法既無， 本性何有性？  
其性無有故， 云何有壞滅？  
諸法有斷耶？ 智者無此念；  
但假有斷名， 求斷處不得。  
欲斷一切法， 微細求覓無；  
毫末及眾多， 諸法皆無有。  
諸法無有者， 此亦是言說；  
彼中如是無， 但有中示現。  
一切法無形， 但有相中現；  
有有及無有， 一切皆假名。  
一切法有合， 示現不合者；  
真如無合故， 畢竟無有物。  
諸法無和合， 無作無滅者；  
如是亦不得， 諸法各各無。  
諸法不可得， 彼等前際無；  
本際既無故， 故名為實際。  
一切法歡喜， 歡喜不可得；  
既無有諸法， 彼亦不可說。  
諸法無歡喜， 彼等二皆無；  
真如中無物， 此是甚深相。  
一切法無嫌， 真如中無我；  
真如無有故， 彼無有嫌處。  
涅槃無讚歎， 彼法不可得；  
諸法無有故， 故名為涅槃。  
諸法無明者， 真如中示現；  
此是假名說， 是故名為思。  
諸法無思者， 此法無定處；  
是故無眾生， 此是諸法體。  
一切法如幻， 彼幻不可得；  
諸法不得故， 說有為諸行。

諸法既無為，此彼真如體；  
無有諸法處，故言無有邊。  
雖言有境界，境界實無有；  
而凡夫所說，故名為境界。  
諸境界虛妄，故說無境界；  
說無有境界，是境界真相。  
言一切法體，彼等無有數；  
彼等既無有，寂定汝等知。  
無得言有得，示現有得處；  
得無得之處，示現故有得。  
彼處無持戒，及破戒亦無；  
無行及無戒，如是諸法相。  
一切法悉無，故名為無明；  
無有諸法故，汝當知是明。  
諸法名字者，彼名實無有；  
既無有法名，當知是涅槃。  
說有受名者，以受故示現；  
是處無有受，故言受示現。  
無有為有相，示現名為有；  
諸法中離有，故言常無有。  
如見幻華已，愚癡言有相；  
有有無有知，是處智無惑。  
法生處不知，此二不可得；  
愚癡人故言，說此為生處。  
諸法若有生，應說當有死；  
生處及死處，此二不可得。  
一切法皆空，諸法不可得；  
善思汝當知，我說如是法。  
菩提不可作，是處作者無；  
若當得菩提，應即見三界。  
若分別菩提，彼不行菩提；  
行行及菩提，彼等無分別。  
一切有真實，真實無有處；  
真實無得故，此是涅槃相。  
畢竟無出者，彼無處可得；  
無有諸物故，不滅復不滅。  
若能知此義，諸法無真實；  
彼等無可生，即不相諍競。

說此甚深法， 若無恐怖時；  
汝應知彼人， 真實是菩薩。」

爾時，世尊說此語已，善思童子復更以偈重白佛言：

「世尊利益我， 出現於世間；  
說此法相時， 我無有疑惑。  
今者具足滿， 佛出不思議；  
我諸見網薄， 今得脫魔網。  
我已斷生死， 已住道場內；  
如來說相時， 斷除我疑結。  
為我說得處， 摧滅諸見等；  
無畏益世間， 善去我心垢。」

善思童子經卷上



爾時，世尊復告善思離車童子作如是言：「善思童子！此菩薩行無虛妄行。善思童子！此菩薩行是哀愍行。善思童子！此菩薩行是無患行，能斷一切諸過患故、慈憐一切諸眾生故。善思童子！此菩薩行甚深微妙無有相行。善思童子！此菩薩行真實能離一切欲相。善思童子！此無欲行，無愛憎故。善思童子！此菩薩行一切眾生平等心行，其心畢竟無所得故。善思童子！此菩薩行大慈悲行，於一切法無有得故。善思童子！此菩薩行大布施行，無有施故。善思童子！此菩薩行不虛誑行，不受一切後身報故。善思童子！此菩薩行無惱忍行，現無諍故。善思童子！此菩薩行發誓願行，捨懶惰故。善思童子！此菩薩行是三昧行，以寂靜故。善思童子！此菩薩行是智慧行，於一切法無有得故。善思童子！此菩薩行是無畏行，心無恐故。善思童子！此菩薩行是無礙行，成就如來諸智力故。善思童子！此菩薩行是增益行，入智慧門無有著故。善思童子！此菩薩行觀十方行，無染著故。」

爾時，世尊欲為善思重宣此義而說偈言：

「無疑惑行者， 為諸菩薩說；  
疑惑及諸行， 此二不可得。  
為諸菩薩說， 有行無行處；  
若知此行處， 彼等無諍競。  
攝受一切法， 為諸菩薩說；  
無所有得處， 此行最為上。  
我行此行處， 彼則顛倒行；  
既住顛倒行， 彼無有畏處。  
此雖名諍行， 彼諍不可得；  
若能如是知， 彼行最上乘。  
此乘無有驚， 佛乘最為上；  
驚及無驚怖， 一切法假名。  
雖說諸行處， 一切不可得；  
一切既不得， 彼行最為上。  
此行甚深行， 愍於一切法；  
愍及甚深行， 皆從分別生。  
甚深及諸行， 是處二俱無；  
若知此際者， 彼於法無沒。」



諸法無可染，非法亦復然；  
此諸法本性，當說無染處。  
無牢及無固，此但是有現；  
無有名字處，此句最為上。  
我雖說有愛，彼處無恐怖；  
以無有物故，彼處不生競。  
此諸眾生行，此處無有真；  
若有知此者，彼為善說行。  
此處無眾生，故我說眾生；  
眾生法一等，此路最為上。  
心及有眾生，畢竟不可得；  
此名為最慈，我前說大慈。  
世間大施主，亦名大眾生；  
常樂行布施，故名大施主。  
法尚不可得，況復當有邊；  
大智菩薩輩，故名為施主。  
佛既不可得，法亦不思議；  
此戒不缺犯，諸法無倚處。  
彼等不思議，佛戒不思議；  
不分別戒行，為諸菩薩說。  
忍向眾生輩，眾生畢竟無；  
此是最勝忍，我法行中說。  
心不可得故，諍競無處生；  
此是最上忍，諸法不可得。  
菩薩無懈怠，不被他毀辱；  
此名最精進，名為不捨取。  
身心善質直，能辦於此行；  
是名最精進，為諸菩薩說。  
菩薩能懶惰，不發諸行等；  
能不捨不取，彼住最精進。  
心界不可得，若外若在內；  
故名寂定心，其心無有處。  
攀緣及心行，真如中無有；  
不思彼三昧，示現如是定。  
我說此三昧，自在修伽陀；  
能行此行者，我說彼得定。  
不以智能知，有諸真如法；  
真如及智慧，此二邊無有。

此法不可得，此是識境界；  
法不以識知，真體此處寂。  
能知如是者，彼等名真念；  
菩薩真如行，世所不能行。  
彼勝一切眾，為眾生說法；  
彼無眾生相，況復有徒眾。  
眾生如幻化，幻化亦無有；  
如是能說者，彼無有恐怖。  
若我若他身，此二俱無有；  
能有此智者，彼無有驚懼。  
諸內及與外，有相畢竟無；  
心無怯弱處，即勝一切世。  
諸法無有礙，猶如虛空行；  
既如虛空行，法真如亦然。  
若能知此智，菩薩無所畏；  
巧解一切法，彼知眾生行。  
既知無眾生，一切法亦然；  
界智巧解知，彼界不可得。  
若入是法門，此路最為勝；  
有能從此道，即知眾生行。  
境界及眾生，此二無有物；  
欲識諸法門，須知此勝智。  
若內若有外，智慧無集處；  
無礙諸法中，故名為實際。  
諸法不思議，故名為佛法。  
彼無所有處，其處亦復無；  
若能如是行，世間無障礙。  
智既無有礙，故名為佛智。  
諸法不思議，彼輩無真正；  
諸法既無體，是覺諸佛法。  
佛及諸佛法，此二俱無有；  
菩提無有故，是名為佛道。  
乘此大乘者，到法安樂處；  
此世最為勝，人世不可得。  
凡世間所有，一切處眾生；  
彼菩薩為勝，行此勝智者。  
能求此諸法，佛法不思議；  
能得此諸法，彼即近菩提。

菩提及諸法， 此二畢竟無；  
能作如是行， 即近諸佛法。  
能行此行者， 不染諸世間；  
既無有染心， 彼去菩提近。」

爾時，世尊說此偈已，復更重告善思離車童子作是言：「復次，善思！我今宣說，若有菩薩摩訶薩等善著鎧者，能於如是甚深經典能善說者，最妙微密善說之時，聞已其人能不驚怖、不悔、不沒，如是菩薩摩訶薩等即得住於菩提道場；即得入於諸佛境界；即證無礙；即住無為解脫法門。又能巧住無得之行，即能觀察一切十方；即能證得大慈大悲；即得諸佛十八不共法；即得無上最大灌頂。說此甚深微妙法時，能有信行、能有思惟如是法者，諸佛已觀彼等菩薩，一切諸佛已護持彼。若菩薩能信此行者，或有不信於此行者，亦為一切諸佛所知。若有能入此法門者，諸佛已知。若能信行此法門者，我當為於彼等作師，彼等則為隨我出家。」  
爾時，世尊欲為善思重宣此義而說偈言：

「彼等證道場， 道場者即空；  
若不取菩提， 彼等即住智。  
諸法無有礙， 畢竟不可得；  
法既不可得， 解脫亦復然。  
諸佛智行者， 一切諸法處，  
及於諸法行， 世尊如是說。  
有礙無礙處， 愚癡作是心；  
佛及大菩薩， 不如是分別。  
雖觀世間法， 世間畢竟空；  
智能觀世間， 彼智亦無有。  
眾生及諸佛， 一種無分別；  
既無分別處， 彼慈最為勝。  
法界廣大性， 眾生界亦然；  
大智諸菩薩， 不如是思惟。  
雖復欲起慈， 彼慈實無體；  
慈體及無性， 非眾生境界。  
若五指量空， 先無今亦無；  
諸世間亦然， 此慈最為勝。  
諸法無上者， 名為諸佛法；  
彼等無得處， 此即是真體。  
世尊大慈悲， 無有形與色；

如是無色法， 是行名世間。  
虛空無有邊， 境界不可執；  
諸佛如是法， 智者行此順。  
是即無上智， 而智不可得；  
智既無得處， 彼處實無有。  
此岸及彼岸， 若思惟若見；  
彼等無此行， 甚深是名相。  
若知此等法， 一切處平等；  
於我法行中， 不假求知識。  
若作取捨心， 分別二見處；  
此事言有者， 彼非善知識。  
有言此法成， 或言此法滅；  
善思此比丘， 非是我弟子。  
言證苦滅者， 畢竟不可得；  
如是說法師， 彼非說我法。  
諸法無起處， 何言諸法集？  
無起處說滅， 彼等遠我法。  
如是寂法中， 無有分別處；  
諸法既無有， 滅處亦復無。  
若有諍競心， 豈名說寂滅；  
善思汝知此， 彼不名真實。  
說道及與法， 此是示現有；  
既示現有處， 彼假現有路。  
我說諸菩薩， 未來世大智，  
能作如是行， 彼依此境界。  
能行此行者， 諸佛說甚深；  
彼已供養我， 利益諸含識。  
能持此經典， 諸大智菩薩，  
彼於未來世， 住持諸法故。  
我所說諸法， 常住無分別；  
此即是菩提， 離此無別道。」

爾時，世尊說是法已，是時善思離車童子，於諸法中即便證得無生順忍。既得證彼無生忍已，遠離一切世間憂喜，得大歡樂；即更飛騰上虛空中，離地高於七多羅樹。

爾時，世尊當於彼時即便微笑。而諸世尊，有如是法微笑之時，從其面門出種種光，其光雜色，所謂青、黃、赤、白、紅、縹、綠、紺、頗梨，彼之光明如是遍照無量無邊諸佛世界，乃至有頂大梵天

宮；照已還迴至於佛所圍繞三匝，遶已從於佛頂而入。當入之時，此之大地具足六種十八相動，動、遍動、等遍動，踊、遍踊、等遍踊，沒、遍沒、等遍沒，震、遍震、等遍震，吼、遍吼、等遍吼，覺、遍覺、等遍覺。

爾時，上界虛空之中，天雨種種細栴檀末，沈水、末香及天華雨，天諸種種微妙音聲自然而作。此之三千大千世界清淨莊嚴，猶如北方鬱單越國，莊嚴華麗一種無殊，此之三千大千世界亦爾無異。

爾時，長老阿難比丘從座而起，整理衣服，偏袒右肩右膝著地，合掌向佛，而白佛言：「希有，世尊！未審如來有何因緣微笑放光？諸佛世尊非無因緣而放光明。」作是語已，即便以偈而白佛言：

「諸佛世間最勝尊， 微笑放光必有以；  
利益之處願尊說， 有此瑞相何因緣？」

虛空天雨華， 供養世尊故，  
歡喜皆歌嘯， 稱讚說此經。  
三千世界中， 種種莊嚴淨，  
猶如鬱單越， 光普照十方。  
如昔諸世尊， 其中授記者，  
佛出光照訖， 迴入佛頂中。  
世尊所放光， 其光種種色，  
從佛面門出， 為我說此因。」

爾時，世尊即以偈告長老阿難，作如是言：

「此童子善思， 宿植善根厚，  
當於未來世， 成佛兩足尊。」

爾時，世尊說此偈已，告阿難言：「阿難！此之善思離車童子，從今已去供養恭敬億那由他阿僧祇劫諸佛如來，承奉不違彼諸佛教。又復供養彼諸世尊，衣服、湯藥、房舍、臥具四事皆足，彼諸如來滅度之後供養舍利，以種種寶而用作塔，其一一塔各各皆高百千由旬，於彼一切諸寶塔中安置舍利，以諸名香供養彼塔。復將一切華鬘校飾，一切諸寶、一切諸幡，種種妙華及栴檀末、沈水末等，而以散上。復將最妙種種音聲以供養之。供養彼諸多陀阿伽度、阿羅訶、三藐三佛陀已，捨最後身而得作佛，名為淨月多陀阿伽度、阿羅訶、三藐三佛陀，出現於世，善逝、世間解、無上士、調御丈夫、天人師、佛、世尊。」

爾時，世尊欲為阿難及諸大眾重宣此義，而說偈言：

「若滿十方界， 諸寶妙珍奇，  
布施佛世尊， 及諸菩薩眾。  
得聞此法相， 如大聖所宣，  
校量財施功， 此福多於彼。」

爾時，長老舍利弗聞佛世尊說此校量功德語已，即更以偈而白佛言：

「世尊說此經， 甚深最微妙，  
而不說名字， 我等云何持？  
此經典所明， 諸法皆平等，  
無有得不得， 希有佛善說。  
有漏及有為， 無漏、無為法；  
此經不分別， 世尊善巧說。  
世間、出世間， 世諦、第一義，  
二界無有異， 此經如是說。  
佛所說諸行， 方便為眾生；  
真理皆悉無， 世尊金口說。  
諸佛及諸法， 彼等一切無；  
能所乘並空， 希有佛善說。  
十方諸世尊， 所說諸法相；  
彼等無真體， 此經如是行。  
善哉大聖尊！ 善哉最勝智！  
此經名云何？ 為我等解說。」  
智慧此語已， 今日決諸疑；  
八功德相圓， 音聲告於彼：  
「欲知此經者， 名為『灌頂王』；  
雖言灌頂王， 灌頂亦無有。  
能持此經者， 諸佛說彼人，  
於天人世間， 當為如寶塔。  
我說是經處， 聽眾有八千，  
多種諸善根， 發無上道意。  
彼等於來世， 決作無上尊，  
得聞此妙經， 難思議福德。  
止住安隱處， 甚深善根中，  
彼乃如是能， 受持此經典。  
係念專讀誦， 此之《灌頂王》；  
彼等人輩於， 諸法無疑惑。」



此不說初忍， 第二忍亦無；  
諸法相既空， 云何有說處？  
若人受持此， 《灌頂王》經典；  
彼作如是等， 諸法乘辯才。  
若有智女人， 受持此經典；  
速捨女雜穢， 罪業不淨身。  
一智一切知， 一切智一知；  
此是持諸法， 此經中具說。  
此經所說法， 入處如虛空；  
我說此入道， 作諸法光明。  
即知種種名， 處處有多種；  
雖復說諸法， 彼法不可得。  
所有無言體， 其相畢竟無；  
知是諸法門， 是名受持法。  
言無諸法者， 彼處有無無；  
此是法體相， 名為陀羅尼。  
若人欲無邊， 一切光明照；  
當持此經典， 善說《灌頂王》。  
欲求法界邊， 此中已說訖；  
彼界不可得， 故名陀羅尼。  
一切法甚深， 法者無得處；  
既無法得處， 彼處無常無。  
若成就辯才， 智深遠無礙；  
乃能知此義， 是經無所著。  
如阿耨達龍， 於空中降雨；  
彼無有心想， 名不可思議。  
若欲廣多宣， 種種辯才說；  
依此經中學， 無倚一切法。  
彼法無來處， 善說如此經；  
諸法無有生， 如此經所說。  
如日光明照， 彼光無處來；  
此經如是明， 法光常充滿。  
來世善男子， 欲無盡辯才；  
當學《灌頂王》， 善說此法本。  
速得無礙辯， 甚深不思議；  
若學《灌頂王》， 世多作利益。  
若不修此法， 無上《灌頂王》；  
彼人不受持， 如是無譬喻。

彼等四部眾，遠我法行中；  
不解此義人，無義可能義。  
若有四部眾，能行此行時；  
無上諸法中，即為世間眼。  
如忉利宮殿，顯現高巍巍；  
此經典亦然，世間最為最。  
如立須彌頂，覩見世間人；  
如是住此經，觀見一切法。  
如人暗夜中，秉高大火炬；  
彼人所行處，終無諸黑闇。  
此經光所照，明見一切法；  
能持此經者，彼無諸闇黑。  
譬如日光焰，一切處悉明；  
此經典亦然，能出多種法。  
又如虛空月，放光明流轉；  
如是此經典，遍照十方界。  
此印諸法印，一切印中印；  
故遣住此印，為諸菩薩輩。  
如欲印虛空，本無亦不住；  
虛空及與印，此二是分別。  
如是佛及法，此經中所說；  
諸佛不可說，諸法亦復然。  
如王捨命時，慇懃善囑授；  
勅諸大臣等，財付我諸子。  
如是聖法身，我昔修習得；  
阿難汝來世，付囑諸菩薩。  
我以說此經，為諸菩薩輩；  
能持是經者，此人福甚多。  
能信受此經，依《灌頂王》說；  
彼人若致疑，我當不作佛。  
人欲自在辯，於諸法無礙；  
應當學此經，我善說《灌頂》。  
世間說諸法，彼是菩提道；  
知已莫應怠，此經當讀誦。  
彼等正信人，於世間無惑；  
既讀誦此經，復能為他說。  
此是諸佛法，為諸菩薩說；  
得聞此經已，甚深難思議。



當說此經時，十方一切佛；  
微笑放光明，各言善說此。  
豎立大勝幢，法幢不思議；  
此經四句偈，為大眾演說。  
巧行多方便，不思議法中；  
能持此經者，兼復為他說。  
彼人共佛語，證法無上尊；  
能持此經者，不思議灌頂。」

爾時，世尊說此偈報舍利弗已，復更重告長老阿難作如是言：「阿難！若有比丘或比丘尼、諸優婆塞及優婆夷，於當來世有能信心聽此經典受持讀誦，彼人當得最大福德。其福德聚不可稱量無有邊際，譬如空界，無有人能量知邊際。如是，如是！長老阿難！此法本中有能受持一四句偈，或自讀誦或為他說，彼人所得功德善根，亦不可量亦不可說無有邊際。」

爾時，世尊欲為阿難及諸大眾重宣此義，而說偈言：

「若能讀誦此，無邊方便身；  
利益多眾生，灌頂王憐愍。  
假使我今說，虛空可度量；  
欲比校斯經，不可得窮盡。  
十方一切佛，世中無上尊；  
若受持此經，悉皆供養彼。  
十方一切佛，斷生死法王；  
能持此經人，名已供養彼。  
十方諸世界，除斷十惡根；  
聞此經典人，能供彼諸聖。  
我未來諸佛，及過去如來，  
現在十方中，兩足尊無上，  
能作師子吼，彼悉供養之；  
能受持此經，諸佛所宣說。  
持資財供養，此非正智人；  
若能持此經，供養中為最。  
一切十方界，滿七寶行檀；  
以供諸世尊，劣持此經福。  
若學此經典，一如灌頂王；  
此敬諸如來，真實如中顯。  
我所說諸法，諸佛不可得；  
彼聞不驚怖，即是供世尊。」

此供養甚深， 世間無解者；  
不取及不捨， 此供養最勝。  
諸佛及諸法， 一切不取捨；  
此供養最勝， 諸佛世尊歎。  
往昔定光佛， 我供養此法；  
此供最為勝， 為諸菩薩說。  
於時彼佛邊， 我持此供養；  
彼佛授我記， 汝當得作佛。  
若當欲作佛， 復為眾生最；  
應成就此路， 是名供養佛。  
我如是供養， 今得成佛道，  
洞達一切法， 堪受天人供。  
所有諸佛法， 世間無上尊；  
乘此最勝供， 諸供養中最。  
證於佛境界， 智慧不思議；  
能作師子吼， 如我今無畏。  
作師子吼已， 得諸法自在；  
解脫眾生輩， 入無漏涅槃。」

爾時，世尊說此經已，善思童子及毘耶離，一切大眾，天、龍、夜叉、乾闥婆、阿修羅、人、非人等，聞佛所說，皆悉信受，歡喜奉行。

善思童子經卷下

---

## [CBETA 贊助資訊](https://www.cbeta.org/donation/index.php)

[.\(https://www.cbeta.org/donation/index.php\)](https://www.cbeta.org/donation/index.php)

CBETA 成立於 1998 年，於 2023 年 8 月 7 日轉型成為基金會。成立多年來，一部部佛典在嚴謹控管中轉換為數位典藏，不只數量龐大，而且文字校訂精確可信，又加新式標點方便閱讀。「CBETA 電子佛典集成」不僅獲得國際學界的重視及肯定，也成為大眾廣為運用的公共資源，如此成果都是在廣大信眾及有識之士的支持下才得以實現。

對一個從事佛法志業的非營利團隊，能夠長期埋首理想、踏實耕耘是非常不容易的。如今，CBETA 運作經費日漸拮据，但「佛典集成」仍有許多未竟之功。因此，懇請大家慷慨解囊、熱情贊助，讓未來有更多更好的電子佛典。

您的捐款本會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

---

## 信用卡線上捐款

本線上捐款與 netiCRM 及 NewbPay 藍新金流合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

不管您持有的是國內或國外卡，所有捐款最終將以新台幣結算，所以我們所開立的捐款收據也將以新台幣計。

線上刷卡支持定期定額與單筆捐款。(銀聯卡不支援定期定額)

## [前往捐款](#)

---

### 劃撥捐款

郵政劃撥帳號：5 0 4 6 8 2 8 5

戶名：財團法人佛教電子佛典基金會

欲指定特殊用途者，請特別註明，我們會專款專用。

---

### 線上信用卡 / PayPal 捐款

PayPal 是一個跨國線上付款機制的公司，CBETA 引用其服務，提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜，由於付款幣別為美元，我們除了會依您所贊助之美元金額開立收據外，另我們會依捐款當日公告匯率開立台幣收據，此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

### [線上信用卡 / PayPal 贊助](#)

---

## 支票捐款

支票抬頭請填寫「財團法人佛教電子佛典基金會」。

For donations by check, please write the check to  
"Comprehensive Buddhist Electronic Text Archive  
Foundation".

---